

Date – 19/12/2024

Time - 18:30 -18:40Hrs

## REGIONAL NEWS BULLETIN

### HEADLINES (EVENING)

1. **Larsap Dr. Hari Babu Kambhampati an Mizoram mipui bank account nei zingah Social Security Scheme a inziaklut an tlem lutuk chu veiawm a tih thu a sawi.**
2. **Power & Electricity Department Engineer in Chief Pu H. Zonunsanga chuan Krismas leh Kumthar vuakvetah renchem leh fimkhur taka kawlpheha hmang turin mipuite a ngen.**
3. **Thingdawl Agriculture Farm ah Lei tellova Alu chi thar chhuahna chu Agriculture and Farmers Welfare Department Minister Pu P.C.Vanlalruatan a hawng.**
4. **Eptu Party lamin Vice President Jagdeep Dhankhar-a rin tawh lohna putluh an rawt chu hnawl a ni.**

<><><>

### GOVERNOR

Larsap Dr. Hari Babu Kambhampati an Mizoram mipui bank account nei zingah Social Security Scheme a inziaklut an tlem lutuk chu veiawm a tih thu a sawi.

Mizoram Rural Bank Chairman Pi Sheryl Vanchhong nen vawiina Raj Bhavan-a an inkawmna ah sawiin Larsap chuan MRB hotute chu mipuite'n bank kaltlanga hamthatna an dawn theihte bakah, bank hman tangkai dante an hriat chian leh zual nana tan la chhonzawm zel turin a chah a. Social Security Scheme leh loan pek chhuak lamah theihtawp chhuah chhonzawma, puih ngaite pui hreh lo turin a chah a ni.

Pi Sheryl Vanchhong chuan Mizoram khawpui leh thingtlang thlenga MRB a inzarpharh that thu sawiin, Social Security Scheme leh bank hman tangkai dan inzirtirna pawh tha taka an kalpui thu a sawi a. MRB chauh nilo, bank hrang hrang customer te'n MRB hnuaia CSP an dawr theih nana Aadhar authentication leh Inter Operable Micro ATM kaltlanga bank account hawn chunchanga harsatna awmte pawh tarlangin, he harsatna hi chinfel a nih theih nan thuneitu NPCI lama hmalak sak turin Governor hi a ngen a ni.

MRB hian tun dinhmunah Mizoramah branch 105 nei mekin hei hi Mizoram Bank awm za zela 40 a ni a, thingtlang bikah chuan za zela 73 an ni pha a ni.

<><><>

### FESTIVE SEASON POWER CONSUMPTION

Power & Electricity Department Engineer in Chief Pu H. Zonunsanga chuan Krismas leh Kumthar vuakvetah renchem leh fimkhur taka kawlpheha hmang turin mipuite a ngen.

P&E Engineer in Chief chuan Krismas leh Kumthar tluang tak leh tha taka mipuiten an hman theih nan department in theihtawp an chhuah thu Akashvani a hrilh a. Mipuite chu fimkhur leh renchem taka eng hmang turin a chah.

P&E hotuten Akashvani an hrilh danin Krismas leh Kumthar vuakvetah Mizoram kawlpheha a hman chu a sang thin a, hei hi mipuiten kawlpheha hmanga meilum an ai thin avang leh an menrei thin tlangpui bakah zan lamah programme hrang hrang huaihawt a tam thin vang te, kawthler leh mimal in hrang hrang te chei vang a nih thu an sawi a. Hengah hian kawlpheha renchem a pawimawh thu leh a kal tluang pangngai tibuai lo thei ang bera mipuiten theihtawp an chhuah a pawimawh thu an sawi a ni.

P&E hotute chuan kawthler leh mimal in chei chu reilote atan a nih avangin kawlpheha hrui zam kualnaah a kal tluang pangngai khawih buai thin a nih thu an sawi a. Fimkhur taka tih loh chuan kangmei tichhuak thei thil hlauhawm tak a ni an ti a. Hei bakah hian ar vulh ngai lo, Krismas pual mahni in leh a vela ar vulh an awm thin thu sawiin ar in leh vawk in atanga kangmei chhuak a awm thin thu an sawi bawk a.

P&E hotute chuan mipuiten a chhit man pe thei tho mahse mipuiten renchem taka eng an hman chuan anmahni mipui tan leh sorkar tan pawh sum a hek dawn lo an ti a. Kawlpheha sang taka hmanin Mizoram eng peknaa bungraw liantham a tihchhiat theih thu leh hei hi department mawh puh vek theih loh chhiatna a nih thu an sawi a. A hmangtu mipuite-a tam tak inngat a nih thu an sawiin a chhia zawng zawng siam turin thawktute an indaih tawk loh thin avangin harsatna hrang hrang a thleng thei bawk niin an sawi a ni.

<><><>

## MIZO FILM INDUSTRY

Lersia Play Chief Executive Officer Pu Gospel Ramdinmawia chuan Mizo film in nasa takin hma a sawn mek a, sum leng vel pawh a pung chak hle a ni a ti.

Vawiina Akashvani Correspondent nen an inkawmnaah Gospel Ramdinmawia chuan Mizoram film industry chuan a kum telin hma a sawn zel a ni a ti a. Anmahni atanga sum hmuhchhuah pawh kum 2021-ah cheng vbc 1 vel, kum 2022-ah cheng vbc 1 chuang hret, kum 2023-ah cheng vbc 3 leh nuai 6 vel leh kuminah pheih chuan cheng vbc 6 vel lai a nih tawh thu a sawi a. Film a tam lutuk tiin sawi mahse sum chevel a pung nasa a, Mizoram film industry hmalam hun a eng hle a ni a ti.

Pu Gospel Ramdinmawia chuan kuminah Mizo film 110 vel a chhuah thu sawiin heng film siamtute hi mumal taka production house anga in register-a kal ai mahin film lam tuipua siam ve mai an nih tlangpui thu a sawi a. Film siamtuten harsatna hrang hrang an tawh ve thin thu sawiin film lo screen-record-a lo ti darh an awm thin thu a sawi a. Hetihruah hian cyber crime police te nena tanpuina zarah dan loa film thehdarh a tlem telh telh thu leh kuminah pheih chuan a awm tawh mang loh thu sawiin lawmawm a tih thu a sawi a ni.

<><><>

## WINTER FESTIVAL

Aizawl sipai lammuala huaihawt mek Winter Festival, 2024 chu mipuiin an hlut hle tih kan corr chuan a sawi, he festival hian tunkar Inrinni thleng a awn ang.

Winter Festival huaihawt tura sorkarin a thlan Mark Advertising hotute chuan Winter Festival tan ni ah mi 4,000 vel an punkhawm thu a sawi a. Tun dinhmunah tlawhtu an pun chhoh zel thu leh nitin tlawhtu mi 4,000 atanga 5000 vel an awm ziah thu an sawi a ni. Mark Advertising hotute chuan festival-ah hian zaithiam hrang hrang te zaiin zan tin concert a awm thin thu an sawi a, hetah hian hranghlui zaithiamte an zai thin bakah zaithiam chhuak thar te an zai thin thu leh, heng zaimi chhuak thar te tan hian inphochhuahna remchang tak a nih thu an sawi a. Khawvel huapa band lar Secondhand Serenade te concert hmanga khar a nih dawn thu an sawi a ni.

Mark Advertising hotute chuan exhibition stall leh food stall hrang hrang chu a dawr siamtute tan inphochhuahna remchang leh sum an lakluhna remchang tha tak a nih thu an sawi a. Mipuite tan pawh bazar tawta kal ngai loa bazarna hmun remchang tak a nih thu Akashvani an hrilh a ni.

<><><>

## AIR NEWS ON SOCIAL MEDIA

Chanchinthar hi Akashvani Aizawl atanga puang a ni a. AIR News Aizawl Youtube Channel, All India Radio News Aizawl Facebook page leh newsonair.gov.in-ah te, chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

## AIZAWL CHRISTMAS BAZAR

Aizawl Bawrhsap Pu Lalhriatpuia'n hunpui laia bazar leh a chhehvel a mipui an him zawk nan ruahmanna tha zawk duan mek a ni a ti.

Krismas hunpui laiin chakkhai leh mamawh lamin Aizawlah mi an fuan khawm nasa hle a, a bikin Barzar pui huam chungah mi an pung khawm nasa in Kawng a kalte in nek nasa lutuk vanga chhiatna thleng palh thei lakah ruahmanna tha zawk neih a tul thu Aizawl bawrhsap chuân a sawi a, New Market sak mek hnuai chu mipuite tan a him lo thei tih sawiin, helai hmuna mipui chet vel dan chu khuahkhirh a tul thu a sawi a, Mipui insu buai lo tur leh hun pui chung bika police emaw home guard emaw pawh koh chhuah a tul tih a sawi baw.

Aizawl DC chuan Kawngpui dunga dawr kawtah mipui kalna hrehawm khawpa inphó chhuakte chu a ngaihawh awm hle tih sawiin, hemi chungchangah endik tura ruahmanna siam a ngai tih sawiin, mipui kawng kalte tan harsatna siam lo turin kawng sir a dawr siam tur te a ngen a ni.

<><><>

## AEROPONIC SYSTEM

Thingdawl Agriculture Farm ah Lei tellova Alu chi thar chhuahna chu Agriculture and Farmers Welfare Department Pu P.C.Vanlalruatan a hawng a.

Pu PC Vanlalruata chuan an Project hawn thar chu Agriculture Department tana rahbi ropui tak a ni, a ti a. Alu chi tha an thar thei zel a nih chuan Alu chingtuten Alu chi tha an indaihlohna nasa takin a puhruk sak

dawn a, an hlawkpui hle dawn a ni, a ti. Vawiina an Project hawn tak chu Agriculture Department mai nilovin Mizoram tana Mel lung phunna pawimawh tak pakhat a ni, a ti a. Amaherawhchu a khawl leh hmunhma te peihfel in awm mahse a thawktuten an enkawl that loh chuan an tum ang in hlawhtlinna an hmu dawn lova, churang chuan a thawktuten an vei angai takzet a ni, a ti. Minister chuan he Project hlawhtlin theih nana an tha leh ngaihtuahna sengtu zawng zawng chungah lawmthu a sawi bawk.

He hunah hian Mizoram State Legislative Assembly Dy Speaker Pu Lalfamkima pawh a tel a ni.

<><><>

**OPPOSITION'S NO-CONFIDENCE MOTION AGAINST VP JAGDEEP DHANKHAR  
DISMISSED**

Eptu Party lamin Vice President Jagdeep Dhankhar-a rin tawk lohna putlulh an rawt chu hnawl a ni.

Deputy Chairman Harivansh chuan Rajya Sabha Chairman Jagdeep Dhankhar-a rin tawk lohna pulut tura eptu lam rawtna chu a hnawl a. Eptu party-te hian Rajya Sabha Chairman chu a rorelna lai lo leh duhsak bik neia puhin rin tawk lohna putlulh an rawt a ni.

Deputy Chairman chuan he thil hi Vice President Jagdeep Dhankhar-a zahawmna tihbawrbanna leh, a hleihluaka chetna a ni tiin a hnawl a. Dan rorelna in zah lohna leh tihchhiat tumna a ni a ti bawk.

Tun thla ni 10 khan Vice President Jagdeep Dhankhar-a a nihna atanga a ban duh eptu member mi 60-in an hming an ziaak a ni.

<><><>